



Nivi Rosing
Inatsisartunut ilaasortaq
Inuit Ataqatigiit
inatsisartut@inatsisartut.gl

**Kiffartuussinissamik isumaqatigiissutit pillugit § 37 naapertorlugu
apeqquteqaammut 2025-050-imut akissut**

Dato: 13-06-2025
Sagsnr.: 2025 - 11506
ID nr.: 97970403

Asasara Nivi Rosing

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

Inatsisartut suleriaasianni § 37 naapertorlugu kiffartuussinissamik isumaqatigiissutit pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Aallarniutigalugu erseqqissaatigissavara, immikkut isumaqatigiissutitut immikkoortinneqarsimasunik Namminersorlutik Oqartussat assigiinngitsunik kiffartuussinissamik isumaqatigiissusiorsimammata, isumaqatigiissutillu immikkoortut susassaqtut assigiinngitsut iluini isumaqatigiissutigineqarsimallutik. Tamannalu pillugu apeqqutip akinerani allassimangippat, uanga immikkoortut susassaqarfimma iluini isumaqatigiissutigineqarsimasut aallaavigissagakkit.

**Apeqqut 1. Kiffartuussinissamut isumaqatigiissutinit immikkoortut
aalajangersimasut piffissami isumaqatigiiffiusumi utertillugit sullissisunik allanik
isumaqatigiissuteqartoqarsinnaava?**

Akissut: immikkut isumaqatigiissutitut immikkoortinneqarsimasunik Namminersorlutik Oqartussat assigiinngitsunik kiffartuussinissamik isumaqatigiissuteqarput, isumaqatigiissutillu immikkoortut susassaqtut assigiinngitsut iluiniillutik. Nalinginnaasumik immikkut atugassaqtitsinikkut isumaqatigiissutit piffissaliussap iluani isumaqatigiissutaapput, taamaalilluni isumaqatigiissuteqarfigineqartut isertitaqarnissartik qulakkeersinnaaniassammassuk.

Sullissisunik allanik isumaqatigiissusiortoqassappat, tamanna isumaqatigiissutitut malittarisassatigut aamma aningaasatigut kinguneqarsinnaavoq.

**Apeqqut 1 A. Naamiuppat: Air Greenlandimik, KNI/Pilersuisumik Ralimillu
kiffartuussininerup naammaginaruunnginnera innersuussutigalugu
kiffartuussinissamut isumaqatigiissutit atuuttut atorunnaarsinneqarsinnaappat?**

Akissut: Tassani suna/suut sumiginnaanertut isigineqassanersoq/-sut pillugu isumaqatigiissutini ataasiakkaani aalajangersarneqarsimasut apeqqutaassapput. Isumaqatigiissutini tunngavissaqarani isumaqatigiissutit atorunnaarsikkusussagaanni, isumaqatigiissut atorunnaarsinniarlugu akilernerqartussanik qularnanngitsumik annertuumik akiliuteqartoqartariaqassaaq.

Apeqquut 2. Tunumi internetimut periarfissap pitsanngorsarnissaa pillugu Naalakkersuisut sunik Tusass A/S-mut piumasaqaateqarpat?

Akissut: Nuna tamakkerlugu, matumani Tunu ilanngullugu, neqeroorutini pitsaanerulersitsinissaq pillugu Naalakkersuisut Tusass A/S-imik ataavartumik oqaloqateqarput.

Apeqquut 3. Internetimik periarfissap pitsanngorsarnissaanut Naalakkersuisut Tusass A/S-mut piumasaqaateqarsimanngippata, tamanna ataatsimeersuarnermi tullermi pissava?

Akissut: Apeqquutip taassumap akinissaani Naalakkersuisut Siulittaasuata Naalakkersuisoqarfia immersueqataasinneqarpoq. Naalakkersuisut Siulittaasuata Naalakkersuisoqarfiata paasissutissiissutigaa, Naalakkersuisut Tusass A/S-imik kisiartaallutik aktiaatilitut ataatsimeersuarnermi isummaminnik annissinissaminut periarfissaqartut, kisianni Tunumi internetsip pitsaanerulersinneqarnissaanik apeqquut eqqarsaatigalugu, tamanna immikkut akuersissutip Tusass A/S-imut tunniunneqartup aaqqissuunneqarneranut ilaatillugu oqaluuserineqartussaassaaq.

Naalakkersuisut isumaqarput, Namminersorlutik Oqartussat aktianik ingerlatseqatigiiffiutai allat assigalugit Tusass A/S-ip suliassani suliatigut, aningaasaqarnikkullu naammagisimaarnartumik ingerlatissagai, soorluttaaq inuiaqatigiit ineriartortinneqarnerini aamma innuttaasunik sullissineri annertuumik tapersiissasut.

Naalakkersuisut Tusass A/S-imik kiffartuussinissamik isumaqatigiissuteqanngillat. Nalunaarasuartaatigut atassuteqarneq nalunaarasuartaatigullu kiffartuussinerit pillugit Inatsisartut inatsisaanni § 5, imm. 3, nr. 1 naapertorlugu, sullissinernut immikkut akuersissuteqarfiusuni atorsinnaassusissatut, sullissinerullu qaffasissusissaatut Naalakkersuisut piumasaqaasiorsinnaapput. Atorsinnaassusissatut, sullissinerullu qaffasissusissaatut piumasaqaatinik aalajangersaasumik massakkut nalunaaruteqanngilaq.

Apeqquut 4. Innuttaasunut isorliunerusuni najugaqartuni, kiffartuussinissamut isumaqatigiissutini immikkut pinngitsuuisinnaanngitsunut sullissinerit pisariaqartut qularnaarniarlugit Naalakkersuisut kiffartuussisunik nutaanik atuilersinnaanermut piareersimappat?

Akissut: Akissut isumaqatigiissutinut assigiinngitsunut, uanga susassaqaqfiginngisannut tunngavoq. Tamanna pillugu isumaqatigiissutit uanga susassaqaqfinniittut aallaavigissavakka.

Uanga nammineq susassaqarfimma iluani (ilaasunik angallassinermut)
isumaqatigiissutini, isumaqatigiissutit aamma ingerlatsisunit kiffartuussissutigineqartut
ataavartumik malinnaaffigineqarnissaat eqqumaffigisorujussuuara.
Paasissutissiissutigisinnaavara, innuttaasunut kiffartuussineq pitsaanerulersikkumallugu
ataavartumik suliniuteqartarmat, uani assersuutigalugu periarfissaatillugu
qulimiguulimmik timmisartuussisarnernut ilassutitut isumaqatigiissusiortoqartarluni.
Innuttaasunik kiffartuussinerup pitsaanerulersinneqarnissaanut ingerlatsisut
aaqqiissutissanik aamma siunnersuusioqqunikuuakka. Taamaattumik neriutigaara,
piffissamut aalajangersimasumut kiffartuussinissamik
isumaqatigiissusiortoqarsimagaluartorluunniit kiffartuussineq
pitsanngortinneqarsinnaasassoq.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Aqqaluaq B. Egede